

Najib namakan Hentian Puduraya 'Pudu Sentral'
The Malaysian Insider
27 Ogos, 2011
Oleh Shazwan Mustafa Kamal

KUALA LUMPUR, 27 Ogos — Hentian Puduraya yang baru-baru ini dinaik taraf dan diberi wajah baru, akan dikenali sebagai Pudu Sentral.

Nama baru itu diumumkan oleh Perdana Menteri Datuk Seri Najib Razak (gambar) yang mengadakan lawatan ke lokasi pengangkutan awam itu, yang terletak di segi tiga emas ibu negara.

"Saya menghantar mesej Twitter ketika sahur ketika pagi ini bahawa saya akan melawat Hentian Pudu... apabila saya mengatakan bahawa saya akan melawat Pudu, ada syor agar nama itu ditukar.

"Selepas berfikir, saya memutuskan nama stesen Pudu ini ditukar kepada Pudu Sentral," kata Najib kepada pemberita hari ini.

Hentian Puduraya mula beroperasi pada 1976 dan dinaikkan taraf tahun lalu.

Ia ditutup sementara pada Mac tahun lalu, setahun selepas kerajaan mendapati terminal itu perlu di naik taraf dan ubah suai untuk memperbaiki perkhidmatan dan mengambil kira keselamatan awam selepas ia beroperasi lebih tiga dekad.

Hentian Puduraya kini dilengkapi dengan pendingin hawa, kemudahan eskalator dan sistem pengumuman awam untuk mengumumkan ketibaan dan pelepasan bas dan disediakan dengan 296 kamera litar tertutup (CCTV).

CCTV dipasang di semua tempat strategik yang dipantau oleh 48 kakitangan keselamatan untuk memastikan keselamatan dan keselesaan pelawat dan penumpang.

The Malaysian Insider
Hakcipta © 2011 The Malaysian Insider
Source:
<http://www.themalaysianinsider.com/bahasa/article/najib-namakan-hentian-puduraya-pudu-sentral/>